



Pasaia Portua
Puerto de Pasaia

Pasaia Portuko Agintaritza
Autoridad Portuaria de Pasaia

Marzo 2011

**“PASAIKO PORTU-EREMUAN ARRAIN FRESKOAREN HANDIZKARIAREN JARDUERAN
ARITZEKO BALDINTZA-ORRIAK”**

1. artikulua.- Lege-oinarria.

Baldintza Orri hauek bat datoz Interes Orokorreko Portuen Araubide Ekonomikoari eta Zerbitzuak Emateari buruzko 48/2003 Legea aldatzen duen 33/2010 Legearen 86. eta 87. artikuluetan xedaturikoarekin.

2. artikulua.- Aplikazio-eremua.

Baldintza-orri hauek Pasaia Portu Agintaritzaren Ionjan Arrain Freskoaren Handizkariaren jardueran aritzean aplikatzekoak izango dira.

3. artikulua.- Arrain Freskoaren Handizkaria.

Baldintza-orri hauen ondorioetarako, Arrain Freskoaren Handizkaritzat hartuko da bere izenean eta bere kontura lanbidez arrantza-produktuak eskuratzen eta horiek beste merkatari handizkari edo txikizkari batzuei berriro saltzen aritzeko behar bezala baimendutako pertsona fisikoa edo juridikoa.

4. artikulua.- Arrain Freskoaren Handizkariak dituen erantzukizun eta betebeharrak.

Arrain Freskoaren Handizkariak behar bezala bete beharko ditu Euskal Autonomia Erkidegoko araudia, Baldintza Orri hauek eta, oro har, Portuko Zerbitzuen eta Poliziaren Araudi Orokorra eta, hala badagokio, baita hura garatuko duten xedapenak ere.

Halaber, Pasaia Portuko Agintaritzak eskaintzen dituen zerbitzuengatik tasak eta tarifak aplikatzearen inguruko obligazio ekonomikoak bete beharko ditu.

Arrain Freskoaren Handizkaria izango da produktuen erantzule bakarra, horiek enkante publikoan eskuratu ondoren, eta halaber, horien geroko manipulazio, prestakuntza eta esportazioarena, erosketatik eta geroko salmentatik ondorioztatzen diren obligazio ekonomikoena eta pertsonai edo gauzei eragiten zaizkien kalte edo galerena, Portuko Agintaritzarenak izan edo hirugarrenenak izan, baldin eta beren jarduera gauzatzean egindako jarduera, ez-egite edo arduragabekeriek eragiten badituzte.

5. artikulua.- Pasaia Portuko Agintaritzaren Ionjaren eremuan jarduera horretan aritzeko baimena.

Baldintza-orri hauen xede den jardueran aritzeko, ezinbestekoa izango da Portuko Agintaritzaren aurretiazko baimena erdiestea, Interes Orokorreko Portuen Araubide Ekonomikoari eta Zerbitzu Emateari buruzko 48/2003 Legea aldatzen duen 33/2010 Legearen 86. eta 87. artikuluetan xedatutakoarekin bat etorritik, eta horretarako, eskaera bat egingo zaio idatziz Pasaia Portuko Agintaritzari, ondorengo dokumentuekin batera aurkeztuz:

- a) Jarduera Ekonomikoen Zergan alta eman izanaren frogagiria.
- b) Identifikazio Fiskalaren Zenbakiaren (IFZ) kopia eta, horrez gain, pertsona juridikoen kasuan, sozietatearen eraketa-eskirituraren kopia, haren estatutuak, ahalordeak eta Merkataritza Erregistroan inskribatu izanaren ziurtagiria.

c) Portuan egin nahi den jardueraren inguruko azalpen-txostena, gutxienez xehetasun hauek emanaz:

Manipulatu beharreko arrain kopurua eta mota.

- Beste jarduera osagarri batzuk eta jarduera hori burutuko duen tokia (portu-barrutiaren barruan edo kanpoan).

- Bere esku dituen bitarteko materialak eta giza baliabideak.

- Egingo den merkaturatze mota (eskualdekoa, probintziakoa, nazionala edo nazioartekoa)

e) Horren ordezkari izango duten pertsonen izena eta NAN; behar bezala egiaztatu beharko da dagokion ahalduz-egiriaren bidez.

f) Helbidea, telefono-, telefax- edo telex-zenbakia, edo helbide elektronikoa.

g) Erregistroan inskribatzeko eskaera egin ondoren gauzatutako aldaketa guztiak Portuko Agintaritzari jakinarazteko konpromisoa, baldin eta aldaketa horiek orain arte aipatutako atalei eragiten badiete.

h) Baldintza Orri hauetako 7. artikuluan aipatzen den fidantza ordaindu izanaren ziurtagiria.

i) Baldintza Orri hauetako artikulua ezagutu eta onartzen dituela dioen berariazko adierazpena.

6. artikulua.- Baimendu eta inskribatzeko eskaeren ebazpena.

Administrazio Kontseiluari edo horretarako eskumena duen Pasaiako Portuko Agintaritzako pertsonari dagokio baimena ematea. Interesatuei jakinaraziko zaie baimen-eskaerei buruzko ebazpena, eta bertan, Portuan burutu nahi den jardueran aritu ahal izateko baimen horretan ezarritako baldintzak adieraziko dira.

Baimena ukatzeko arrazoiak ondorengoak izan daitezke: Baldintza Orri hauek ez betetzea, eskatzaileak Portuko Agintaritzarekin zorrak izatea, berme tekniko eta ekonomiko egokiak ez eskaintzea, edo Pasaiako Portuko Agintaritzak eskatzen dituen beste baldintza batzuk ez betetzea.

Baldintza Orri hauetan aipatzen diren jarduerak horretarako baimendutako pertsona fisiko edo juridikoek bakarrik gauzatu ahal izango dituzte Portuan. Baimen horiek hiru urteko iraupena izango dute eta baliogabetu egingo dira Baldintza Orri hauen 9. artikuluan aipatzen diren kasuetan.

Baimena eman ostean, baimendutako pertsona fisiko edo juridikoa Pasaiako Portuko Agintaritzaren Arrain Freskoaren Handizkarien Erregistroan inskribatuko da.

7. artikulua.- Fidantzak eta Bermeak.

Baldintzen Orri hauetan arautzen den jarduerak berekin dituen obligazioengatik Portuko Agintaritzaren aurrean erantzuteko, Arrain Freskoaren Handizkari bakoitzak mila euroko (1.000€) fidantza bat eratuko du Portuko Agintaritzaren alde, eta Handizkariak Portuko Agintaritzarekin dituen obligazioak estaliko ditu.

Fidantza horiek eguneratu ahal izango dira, Pasaiako Portuko Agintaritzaren iritziz. Fidantzak hilabeteko epean erregularizatu beharko dira, Portuko Agintaritzak horien zenbatekoaren aldaketa jakinarazten duen unetik kontaktzen hasita.

Fidantza horiek ordaintzeko —Arrain Freskoaren Handizkariak Portuko Agintaritzaren aurrean dituen obligazioei erantzuteko moduan finkatuko dira beti—, abala edo bankuaren berme nahikoa edo zuzenbidean onartzen diren gainerako bitartekoak erabili ahal izango dira, betiere Portuko Agintaritzak eskainitako ereduak deskribatzen diren hitzetan.

Fidantzak Portuko Agintaritzaren lehendakariaren izenean jarriko dira. Abalen kasuan, sinadurek askietsita egon beharko dute.

Arrain Freskoaren Handizkariari emandako baimena iraungitzen bada, eta hark Portuko Agintaritzarekin zituen obligazioak bete ez izanagatik fidantza osoa nahiz haren zati bat galdu duen kasuetan izan ezik, hura itzuli edo kitatu egingo da, hala badagokio, Baldintza Orri hauetako 4. artikuluan xedaturiko likidazioak ordaindu ostean.

Hartzekodunen konkurtsoko egoera legalen kasuan, aurrerantzean Pasaiako Portuko Agintaritzari eskatuko zaizkion zerbitzuen zenbatekoa ordaindu beharko da aurretiaz. Bestela, zerbitzu horiek ukatuko zaizkio.

8. artikulua.- Portuko Agintaritzak fidantza erabiltzea.

Arrain Freskoaren Handizkariak Baldintza Orri hauetako 4. artikuluan aipatzen diren likidazioen ordainketatik eratorritako diru-erantzukizunak ez betetzeak edo 10. artikuluan zehaztutako tasa edo Portuko Agintaritzak ezarritako isunak ez ordaintzeak aurretiaz jarritako fidantza erabiltzea eragingo du.

Aurreko paragrafoan aipatutakoa betetzearren Portuko Agintaritzak fidantza osoa nahiz zati bat erabili beharko balu, Arrain Freskoaren Handizkariak berriz jarri edo osatu beharko du fidantza hilabete bateko epean, Portuko Agintaritzak hura erabili duen egunetik kontatzen hasita. Interesatuak ez badu epe horretan fidantza berriz jartzen edoosatzen, baimenari uko egiten diola ulertuko da eta baja emango zaio Erregistroan, betiere dagozkion ondorioei kalterik egin gabe, hura zordun gertatuz gero.

Fidantza berriro ordaindu edo osatu gabe dagoen bitartean, Portuko Agintaritzak aurretiaz jarri dadila eskatu ahal izango du bere eskumenaren arloan eskaintzen diren zerbitzu-tasak eta tarifak kobratzen direla bermatzeko.

9. artikulua.- Baimena iraungitzea.

Portuan Arrain Freskoaren Handizkariaren jardueran aritzeko baimena iraungita geratuko da honako kasu hauetan:

- a) Norberak hala eskatzen duenean.
- b) Portuko Agintaritzak baliogabetzen duenean. Kasu honetan, jarduera uzteko epea urtebetekoa izango da gutxienez eta Arrain Freskoaren Handizkariak ez du kalte-ordainak jasotzeko eskubiderik izango.
- c) Heriotza, gerora gertatutako ezgaitasuna edo porrot egitea, pertsona fisikoen kasuan.
- d) Nortasun juridikoak porrot egiten duenean edo hura likidatu edo desagertu egiten denean, Arrain Freskoaren Handizkaria pertsona juridiko bat denean.
- e) Baldintza Orri hauetako 7. eta 8. artikuluetan zehazten den moduan fidantza eratu, osatu edo eguneratzen ez denean.
- f) Baldintza Orri hauetako 6. artikuluan adierazten den epea amaitzen denean.
- g) Baldintza Orri hauetan xedatzen diren baldintzak behin eta berriz betetzen ez direnean.

Artikulu honetan aipatzen diren baimena iraungitzeko arrazoiren bat gertatzen bada, Portuko Agintaritzako Zuzendaritzak interesatuari jakinarazi eta hamabost eguneko epea emango dio honek egokitzen jotzen dituen alegazio idatziak egin ditzan, baimena norberak nahi duelako edo epea amaitu delako iraungi den kasuetan izan ezik. Epe hori amaitzen denean, Administrazio Kontseiluak edo horretarako eskumena duen pertsonak baimena iraungi dela adierazi ahal izango du ebazpen arrazoitu bidez.

Baimena iraungi ostean, pertsona fisiko edo juridikoa Erregistroko inskripziotik kanpo geratuko da.

Baimena iraungitzen denean, Portuko Agintaritzak ez du inolako erantzukizunik izango titularraren aurrean, eta ez du inolako ardurarik izango titularrak izan zitzakeen eta aldi baterako edo behin betiko etenda geratu diren ekonomia-, lan- eta kontratu-arloko betebeharrei edo bestelako betebeharrei dagokienez.

10. artikulua.- Tasak.

a) Arrantza freskoaren tasa (T-4)

Errepidez arrantza-barrutira arraina ekartzen duen handizkariaren jardueran aritzeko baimena duen titularrak dagokion tasa ordainduko du Portuko Agintaritzaren alde. Tasa hori kalkulatu eta ordaintzeari begira, Interes Orokorreko Portuen Araubide Ekonomikoari eta Zerbitzuak Emateari buruzko azaroaren 26ko 48/2003 Legea aldatzen duen 33/2010 Legearen 16. artikulua hartuko da kontuan.

b) Jarduera-tasa

Errepidez arrantza-barrutira arraina ekartzen duen handizkariaren jardueran aritzeko baimena duen titularrak dagokion jarduera-tasa ordainduko du Portuko Agintaritzaren alde, 33/2010 Legeak aldatzen duen 48/2003 Legeko 11. artikulua araberara.

Era berean, zerbitzua eskaintzen duen pertsonari emakida edo baimen bat eman bazaio, honek dagokion okupazio-tasa ordaindu beharko du. Ustiaketa- edo eraikuntza-fidantzek tasen ordainketa bermatzen duten arren, Portuko Agintaritzak premiamendu-prozedura erabili ahal izango du horiek kobratzeko, 33/2010 Legeko 9. artikulua araberara.

11. artikulua.- Harremanak Portuko Agintaritzarekin.

Arrain Freskoaren Handizkariak Portuko Agintaritzak finkatutako agiriak eta formatuak erabiliko dituzte harekin harremanetan jartzeko. Era berean, arrainaren salmenta hobeto antolatu eta kontrolatzearen, Portuko Agintaritzak agintzen dituen neurri guztiak hartu beharko dituzte.

12. artikulua.- Enpresako langileak.

Baimen-eskaria egiten denean, Arrain Freskoaren Handizkariak behar bezala jakinarazi beharko dio Portuko Agintaritzako Zuzendariari nor izango den edo izango diren bere ordezkariak jarduera garatu, aginduak jaso eta kontsultak nahiz eskaerak egiteko, eta, horrez gain, ahalik eta lasterren jakinarazi beharko dio horiek ordezkatzeko dituztenean. Portuko Agintaritzako Zuzendariak interesatuaren ordezkariak ukatu ahal izango du ebazpen arrazoitu bidez.

Era berean, kaiko gune mugatuetan sartu behar duten pertsonen izenak jakinarazi beharko dizkio uneoro Portuko Agintaritzako Zuzendariari, horiei gune mugatuetan sartzeko baimenak eman eta hauek Arrain Freskoaren Handizkariaren jarduerarekin loturiko lanak gauzatu ahal izan ditzaten.

13. artikulua.- Enpresaren tresneria eta bitarteko lagungarriak.

Enpresaren tresnak portu-eremuan erabili ahal izateko, behar bezala bete beharko dira Portuko Zerbitzuen eta Poliziaren Araudi Orokorrean xedatzen diren izaera orokorreko baldintzak eta jarduerarako baimena jasotzean finkatu diren baldintza bereziak; horrez gain, Portuko Agintaritzako Zuzendariak erabilera horretarako baimena eman behar du.

Partikularren tresneriari dagokionez (kaxak, eskorgak, gurdiak, mahaiak, baskulak eta jarduerarako beharrezkoak diren gainerako makina eta objektuak), tresna guztietan jabearen izena, iniziala edo bereizgarria adieraziko da, eta hala badagokio, baita horien tara eta karga-gaitasuna ere. Portuko Agintaritzako Zuzendariak uste badu tresna horietakoren batek ez dituela xede den jarduerarako baldintza egokiak betetzen, enpresak hura baztertu beharko du Zuzendariak adierazitako epea igaro aurretik; bestela, Portuko Agintaritzak berak baztertuko du haren izenean, dagokion zigorrari kalterik egin gabe.

Arestian aipatutako partikularren tresna guztiak eta beharrezkoak izan litezkeen gainerako elementuak Portuko Agintaritzak agindutako lekuan utziko dira, egunero, lana amaitzean. Leku horretatik kanpo aurkitzen diren elementu guztiak Portuko Agintaritzako zerbitzuek jasoko dituzte eta ez dira jabeen eskuetara itzuliko bilketa horrek eragin duen kostua ordaindu arte, betiere dagozkien zigorrei kalterik egin gabe.

14. artikulua.- Ingurumena babestu beharra

Ingurumenaren arloan indarrean den legeria betetzen dela bermatu beharko da, lonjan aritzeko baimena duen titularraren lan eta jarduerari eragin diezaiekeena, batik bat hondakin, isurketa, eta zarata eta partikulen igorpenari dagokionez; beraz, administrazio eskudunek agindutako baimenak eta lizentziak eskuratu beharko dira jarduera horiek gauzatu ahal izateko. Hori guztia zerbitzua eskaini ahal izateko eta horiek indarrean mantenduz.

Horretarako, IP-VIG-001 Prebentzio Orokorrerako Jarraibidearen 5. atalean xedaturikoa ere bete beharko da, 2011ko otsailaren 23ko GAO n argitaratua eta I. Eranskin gisa erantsia: "Zerbitzuko portu-eremuko sarrera, bide eta jabari publiko komunean sartzeari, zirkulatzeari, egoteari eta prebentzioko neurri eta arrisku orokorrei buruzko informazioa".

15. artikulua.- Arau-hausteak eta zigorrak.

Arau hauek betetzen ez direnean, Portuko Agintaritzak dagozkion zigorrak ezarriko ditu Estatuko Portu eta Merkataritza Nabigazioari buruzko Legea, haren xedapen osagarriak eta Portuko Zerbitzuen eta Poliziaren Araudi Orokorra eta haren Portuko Ordenantzak kontuan hartuta, izan ditzakeen erantzukizun zibil eta penalez gain.

16. artikulua.- Baldintza Orri hauen aplikazioa eta interpretazioa.

Portuko Agintaritzako Zuzendariak eta horretarako eskumena duen pertsonak, izaera orokorrean edo kasu partikular bakoitzean, beharrezko aginduak emango dituzte Baldintza Orri hauek betetzen direla bermatzeko, eta beharrezko interpretazioa egingo dute Portua behar bezala ustiatu dadin.

17. artikulua.- Erreklamazioak eta errekurtsok.

Baldintza Orri hauen aplikazioari buruzko erreklamazioak Portuko Agintaritzaren Administrazio Kontseiluak ebatziko ditu eta ebazpen horiek amaitutzat emango dute administrazio-bidea; dena den, errekurtsoa aurkeztu ahal izango da, administrazioarekiko auzi-bidez, dagokion Justizia Auzitegi Nagusian.

Tasei buruzko erreklamazioei dagokienez, ekonomia-administrazio bidetik aurkeztu ahal izango da errekurtsoa.

Aldi Baterako Xedapena.

Baldintza Orri hauek indarrean sartzen direnean beren zerbitzuak eskaintzen dituzten Arrain Freskoaren Handizkariak Orri hauetan zehazten diren xedapenetara egokitu beharko dute horiek argitaratu eta hiru hilabeteko epean, eta dagokien baimena eskatu beharko dute.

Ez badira aipatutako epean egokitzen, Portuko Agintaritzak dagokion baimena ukatu ahal izango die eta Erregistroan inskribatu gabe utzi ahal izango ditu; horrenbestez, ezin izango dituzte beren jarduerak gauzatu portu-eremuan.